

malaperis.

“Jen noto!” diris Ron subite. “Noto falis el ĝi!”

Hari demetis la mantelon kaj kaptis la leteron. Skribita per mallarĝa, ronda kursivo, kiun li neniam vidis, estis la sekvaj vortoj:

Via patro lasis tion sub mia varto antaŭ ol li mortis. Estas ĝusta tempo por redoni ĝin al vi. Uzu ĝin saĝe.

Tre Feliĉan Kristnaskon al vi.

Ne estis subskribo. Hari fiksrigardis la noton. Ron admiris la mantelon.

“Mi donus *ion ajn* por havi unu el tiuj,” li diris. “*Ion ajn*. Kio okazas al vi?”

“Nenio,” diris Hari. Li sentis sin strange. Kiu sendis la mantelon? Ĉu iam lia patro vere posedis ĝin?

Antaŭ ol li povis diri aŭ pensi ion plu, la dormeja pordo salte malfermiĝis, kaj Fredo kaj Georgo Tordeli ŝtormis en la ĉambron. Hari rapide puŝis la mantelon elviden. Li ankoraŭ ne deziris montri ĝin al aliaj.

“Feliĉan Kristnaskon!”

“Jen, rigardu – ankaŭ Hari havas tordelian trikoton!”

Fredo kaj Georgo portis bluaj trikotojn, unu havanta grandan flavan F-on, kaj la alia G-on.

“Tiu de Hari estas pli bona ol niaj, tamen,” diris Fredo, montrante la trikoton de Hari. “Ŝi evidente pli klopodas, kiam oni ne estas familiano.”

“Kial vi ne portas la vian, Ron?” Georgo demandis. “Eku, surmetu ĝin, ili estas belaj kaj varmaj.”

“Mi malamas brunruĝan,” Ron ĝemis senentuziasme dum li tiris ĝin desupre ĉirkaŭ sian kapon.

“Vi ne havas literon sur la via,” Georgo rimarkis. “Supozeble ŝi opinias, ke vi ne forgesas vian nomon. Tamen ni ne estas stultaj – ni scias, ke ni nomiĝas Gredo kaj Feorgo.”

“Kia bruo!”

Persi Tordeli puŝis sian kapon preter la pordo, aspektante kvazaŭ li malaprobas ion. Li evidente duone tralaboris la malpakadon de siaj donacoj, ĉar li ankaŭ portis senforman trikoton sur sia brako, kion Fredo ekkaptis.

“P signifas prefekto! Surmetu ĝin, Persi, eku, ni ĉiam portas la niajn, eĉ Hari havas sian.”

“Mi – ne – volas – ” diris Persi dampate, dum la ĝemeloj trudis la trikoton sur lian kapon, frapante liajn okuvitrojn malrekte.

“Kaj vi ankaŭ ne sidiĝos kun la prefektoj hodiaŭ,” diris Georgo. “Kristnasko estas tempo por la familio.”

Ili portis Persi vizaĝmalsupre el la ĉambro, kun liaj brakoj premataj